

國朝文錄卷之二十一

序跋類九

福建續志理學傳序

沈廷芳

自昔三代之隆道在鄒魯宋之中葉道在濂洛南都既遷羣儒講述道在於閩夫使瀕海喬野之區彬彬與鄒魯同俗豈非理學教化之力哉前志載人物不爲理學立傳紀事而不提其要識者病焉今夫道原出於天天卽理也別其名曰誠曰敬曰至善曰大中曰仁義而體之身則爲學是皆所謂道也堯舜周孔之道足乎已措諸家國天下其所言不假窮幽析微萬理皆備孔子旣沒異端爭起亂當世於是孟子道性善尊仁義辭而闕之至漢諸儒說經各以家法紛綸甄釋交相是非然而前聖遺經賴以不墜及唐昌黎韓氏起攘斥佛老遏六季之橫流遵孔孟之極軌其可惜者志在經濟文詞不屑以訓詁教人爲事故人知道至宋儒而明而不知韓氏之實有以啟之也宋賢濂溪周子肇啟道源推以陰陽五行太極之理而關中張橫渠氏又極言知禮成性理一分殊之旨及二程子生河洛擴濂溪之緒道賅鉅細一本乎誠學無津涯而莫先格致當是時諸君子聞風興起宏闢道微千里游從講壇相望是故劉質夫謝顯道呂與叔之徒衛道於北厥後許魯齋劉靜修繼之至明復有曹正夫薛敬軒呂涇野諸公而楊龜山游定夫二子載道以南豫章延平嗣起閩學大盛新安朱子僑寓建陽得羅李之傳私淑程子述先聖之道燦然明備諸弟子得其傳者五十有三人而金華四子本之黃直卿氏明時儒者大江以南如胡叔心章楓山魏莊渠羅整庵敦行最著閩則蔡虛齋陳晦德盛稱焉方朱子之講學四方也謂格致誠正入道之源在是而一本於居敬同時象山陸氏則主人生而靜之說持論往往齟齬逮白沙陳氏姚江王氏生二三百年後從而祖述之號曰心學天下靡然從之浸淫不返流及虛無而閩之君子率原

本程朱宗白沙者惟陳茂烈一人此理學之正宗也於是徵據羣論折衷正史萃諸賢而登之各綜其行事以海濱四先生閩學所防而諸儒弟子學有淵源與夫經術湛深博雅通明足爲吾道之翼者咸並列焉庶海濱鄒魯之稱爲不誣矣

石東邨詩序

李 錯

士君子得時則大行不得時則龍蛇小子夏田子方其人乎不踟蹰險艱載道以游逶迤之懷固有在也逮漢董子尙其廁之賈生則廉劇兼厲用促厥生傷哉若乃展禽仲連同塵汚塗忙慨絕俗亦足以處明夷矯當世嗟乎數君邈矣予安往從之哉石君東邨志古者也尙氣節好讀書善處骨肉之間而周友朋之急穆乎有數君之風家本貴游比者日困阨走衣食勉旃東邨今而後徵子所存夫語有之孔尾雞口詘前羸後獨不見夫千鈞之弩乎穀而不張曾不足以發蓬矢惡見其一激而逾西霜之山也東邨工詩歌周章坎壈中無齷齪語弼中彪外具見一端云

朱子大全精言序

周大璋

余嘗采朱子之書芟定大全並取有明以來學者之言次第別白綴以管見彙爲一書將以問世就正於吾友張子寶臣且請所以名之者張子爲之正其謬舛補其疎漏作而言曰今夫四書學問之淵源而性理之本根也微言大義上接堯舜湯文之統而下啟濂洛關閩之傳在昔明祖定制以帖括取士先四子後五經至今沿之蓋欲學者精思默契得不言之妙緒而會本末於一原合顯微於無間也世之學者不知國家所以育才造士之意往往因陋就簡尋章摘句以便揣摩之資其高者又復出入莊列申韓一切誣民惑世之言自矜宏博卽一二畱心理學之士亦以爲道在五經性理諸書而於四子書輒鄙弗道以爲此爲帖括設也孔曾思孟繼往開來盡在此書而第以供帖括之用乎哉朱子集周程之大成其於四子書尤不遺餘力豈逆計後之爲帖括者

而爲之導其先路乎且國家開設科目以帖括取士首尊四書意豈止於帖括而已乎夫不精心於四書而能涉聖學之津涯者未之有也然不精心於朱子之書而能躡四子之藩籬者亦未之有也且不精心於朱子以後諸儒之書折衷於朱子而能窺朱子之堂戶以入四子之閫奧者更未之有也今子是書冥心搜討一以朱子爲宗旁及大全下逮百家條舉衆說而斷以己意使四書奧旨瞭然如指諸掌可不謂精乎是宜名精言余應之曰言之難精也非一日矣昌黎之黜荀楊也曰擇焉而不精語焉而不詳蓋道之不明實自此兩言始余竊以爲擇之不精語之不詳無害也擇之能精語雖不詳亦無害也擇不精矣又復嘖嘖不休肆其胸臆以簧鼓當世其爲害豈淺鮮哉今夫朱子之書其浩渺而難窮微妙而難窺也亦已甚矣不得其所以言而徒據其言以爲抉擇終不能與之條析而貫通而大全一書同異得失紛紜百出尤未易明也至有明中葉而後揚陸之波張王之幟以與考亭爲難者所在多有鼎沸蜩鳴至今未息世之君子亦嘗大聲疾呼爲之剖別是非辨析離合自以爲折衷羣言歸諸一定矣今試取其書讀之其所謂是者果盡無非之可議乎其所謂非者果盡無是之可採乎其自逞其說以高掩前人者果盡有合無離能如朱子之歷千載而如會一堂合衆聞而悉歸一己乎彼非不自謂言之精也而無如言之終未能精也況淺陋如余未窺朱子之萬一而欲採擇不謬條舉衆說斷以己意遂以爲言之皆精也其敢乎哉其敢乎哉張子曰精而不自以爲精者子之慎也精而必欲求其精者子之志也朱子之集精義也於河南兩程子則曰言雖近而探之無窮指雖遠而操之有要此固言之至精者橫渠以下九家之言則以爲非敢必無少異但大者既得則其淺深疎密之間學者所宜盡心焉是言未必皆精而亦同以爲精也子其倣此意以名是書可乎余曰余之言固其不精者也明儒以來之言不能皆精者也至於朱子言無不精不必余擇之而後精亦或不因余擇之而遂不精也

大全之言本不皆精不因余擇之而遂不精亦或以余擇之而至於精也必不得已從吾子之志倣精義之例其以精言名朱子與大全而可乎既以復於張子因序其說於簡首

春秋列國地形險要表序

顧棟高

險要之爲天下重也從末世起也羣雄起而後有戰爭戰爭用而後出奇制勝設守要害則險要尙焉太平之世天下爲家未嘗有也余讀左氏知春秋險要之地莫多於秦晉吳楚鄭衛鄭衛南北所爭而吳楚秦晉壤地相錯爲日交兵之國桃林二穀茅津之爲西北險也以秦晉七十年之戰爭著

也

汪氏曰秦晉七十年之兵爭起於穀之戰終於襄十四年十三國之師

函谷一入秦而六國之亡兆矣鍾離州來居巢之爲東南險

也以吳楚七十年之戰爭著也

林氏曰鍾離州來居巢吳爭七十年而後得此州來一入吳而入郢之禍基矣他如齊穆陵

之爲大岷晉劉裕過之而喜形於色者而地鄰莒魯強晉東來道所不經故戰伐罕書焉晉南陽之

卽河陽唐李光弼百戰守之以固關輔者而界連周鄭方輯和以拱衛故兵爭亦不及焉輟轅伊闕同一險也伊闕以備子朝而著而輟轅則無聞虎牢敖倉同一要也虎牢以晉悼之城而著而敖倉則無聞至晉楚懸隔千里所爭惟在鄭宋楚成彭城以塞晉之通吳晉城虎牢以防鄭之服楚春秋尤大善特書少習武關爲秦豫咽喉之地秦人滅郢蓋欲南出以圖武關而卒不能有及楚圖北方將通少習而晉人震懼豈非襄郢商雒之間地形扼塞與函谷俱稱絕險哉故險要有常所初無定形有千年不易之險要有一時因敵爲防之險要往往在後世爲要害在春秋爲散地者此亦古今時勢不同之故也然考春秋時列國用兵鬥爭不滅後世而其時禁防疎濶凡一切關隘扼塞之處多不遣兵設守敵國之兵平行往來如入空虛之境其見於左傳者大畧可考文十三年春晉侯使詹嘉處瑕以守桃林之塞注云以備秦桃林今潼關也昭二十六年秋晉知躒趙鞅帥師納王使女寬守闕塞注云以備子朝闕塞今伊闕也二者天下之險必待紛紜有事而後遣將設守則其平日

之漫無閑禦可知矣齊莊公之伐晉也入孟門登太行封少水而還而晉僅於其還也使趙勝率東陽之師追之而已而晉平日之備禦無有也吳闔閭之入楚也舍舟淮汭自豫章與楚夾漢道由大隧直轅冥阨而司馬戊第於旣陣始議塞城口以邀其歸路而楚平日之控扼無有也是皆一夫守險千人莫過使當日有一旅之師百夫之長當關旅拒則齊必不能輕騎而入羊腸之隘吳必不能疾驅而至漢水之濱也以至文五年秦人入郢道由上雒出武關經歷晉之陰地是時秦晉已絕好而都在南陽之析城深入東南五百餘里秦出兵與楚爭郢而晉人不之禁也僖三十三年秦人襲鄭道自華陰出函谷關經歷二嶠及周之轅轅伊闕而後至河南之偃師行欽巖深穴中二千餘里商人弦高遇諸途而始覺而周人晉人不之詰也他若晉會十三國諸侯於柤而柤爲楚地吳伐魯而子析故從武城道險是蓋列國皆然主者無設險固圉之謀敵人無長慮卻顧之志處兵爭之世而反若大道之行外戶不閉歷敵境如行几席如適戶庭主人能則有秦穆之哭師主人不能則爲楚昭之失國春秋之所以日尋於多事者以此也易有之重門擊柝以待暴客又曰慢藏誨盜夫土地人民國之寶藏敵國外患國之大盜偃然弛備而欲狡焉啟疆者不胥其篋刼其藏得乎善爲國者慎其封境險其守集深維大易設險之謀重凜周書慎固之訓庶乎姦宄戢志而強鄰寢謀矣

易翼述信序

陳祖范

五經傳述多可疑書疑後出之古文然大義無害詩疑朱子廢小序禮疑於異同之聚訟春秋疑四傳之互有得失易脫秦火獨爲完備以其義蘊精微廣大精微則求而愈有廣大則無所不通術家主數流於星厯災異儒家主理至與莊老同稱唐正義屏諸說之紛糾獨行輔嗣易道一爲清夷宋有邵數程理之分數出京焦之上直追太始理達日用行事不墮元虛朱子兼綜兩家成本義微畸尙邵焉竊謂易鮮不同與他經異他經之說或全非經義而害於經說易者雖不同要皆經中所有

特不宜專主以蔽全經耳何也精微則求而愈有廣大則無所不包也然以夫子學易寡過之旨準之則斷乎程傳爲長矣象象傳君子以六十有四舉凡天文地理物象一一引歸身心之間而得一切近融合受益利用處學者誠於此求之義文周孔真吾師也何必高談先天爲義畫追所自出何暇旁求直日納甲生尅虛旺之小數哉吾夫子不雅言易今學士偏喜言易論著之多幾於家田何而人虞鄭易道其日益昌明乎若夫謹於立說不苟同不立異不冥搜於文字之前不經縛於形象之內主翼以明經而不歧後聖於先聖王介山先生易翼述信之作斯爲足尙矣先生自言幼稚讀易卽致疑老始信而有述中間數十年家居官守應事接物舟車傳舍之間易義未嘗一息去懷蓋其於易也惟務自得不輕著書異乎世之苟作以求知者予惟讀經病不能疑因而不求甚解蔑由取信又病鑿空生疑與輕於自信與疑而終不底於信皆爲滅裂於學者也先生之於易能疑又能信大畧與費氏以繫辭文言解說上下經體例相近費氏無章句而先生有成書嘉惠來學多矣

詩集自序

陳祖范

古無詩人三百篇可知誰作者十止得一二蓋夫人而能爲詩夫詩而皆有係於時也古之制田功旣畢男女同巷夜績有所怨恨相從而歌飢者歌其食勞者歌其事男女老而無子者官衣食之使之民間求詩以備太史之采是故王者不出戶牖盡知天下所苦樂此風詩之所由興也大抵詩之作出於無心則其情真又必各有所爲故其義實情真義實故一國之事係一人之本而匹夫匹婦之歌吟可以察治忽也後之詩人則異是彼旣以詩自命人亦以詩相屬於是外物爲主而詩役焉詩爲主而心役焉以詩役心則心非其心特牽於詩耳詩於是無真性情以外物役詩則作如不作特緣於外耳詩於是無真比興然而情實彌隱詞采彌工義理彌消波瀾彌富而又格律以繩之派別以嚴之時代以區分之回視詩教之本來其然乎其不然乎古之詩男女自言其傷而關盛衰後

之詩文人學士弊精勞神期以鼓吹風雅反或無與於得失其故何哉誠僞之分醇醜之判也予於斯事不求甚解而竊好反尋其本收拾舊稿其無爲而作者去之其爲人而作者又去之止存其自吟自止用適己事者工拙所不計也

王次山詩序

陳祖范

次山遺詩非予誰宜序之者顧予甚不願序次山詩中心抑塞難以衆曉何則人生平必有所心矢意蓄期以自見不甘泯沒於後後死者爲之道其甘苦指其短長表而出之斯存沒兩無憾也若次山之所心矢意蓄期以自見者吾知之矣雅不在詩業已命不從力力不稱心貧病交侵中壽殞命所存叢殘詩稿譬江河之餘波園林之片葉興會偶及不自矜寵顧乃沾沾取而序之而著之不適爲淺之平待次山哉雖然正惟乃爾故不得不就詩以存次山吾見夫撚鬚聳肩窮老盡氣者之爲詩也詩工矣意量不出聯絕之間聲病之細惟不欲以詩自見者不役其性靈於詩不囿其才識於詩然而性靈才識往往迸發流溢而不能掩遏次山爲人疏亮鯁直骯髒多感不能委曲順時塞嘿取容故其詩亦軒朗勁特不肯以含糊爲溫厚佻薄爲風雅視夫雕飾工緻工力深而氣骨不足者雖時所愛尙不喜也噫人識吾不樂序次山詩之意又識吾就詩以存次山之意則其知次山也亦庶幾焉

書盧全月蝕詩後

陳祖范

歲在己亥七月十五夜月蝕與兒子檢誦玉川子詩及韓子效其體之篇誦已告之曰文之奇至於如是而止矣然特其外之文辭奇焉耳攷其義意甚正而無奇也感天眼之失明憤凶臺之狂逆歎列宿之環視而不救思以其下土區區之心上通帝座一旦正明刑辟盡撤部蔽而復其明兩之常可謂言誕而意誠詞險而理順者也如斯體製蓋出於易之爻象如豕負塗鬼一車日中見斗龍戰于

野詩之託興如箕噏舌牛服箱及屈子天門九歌之類是皆怪怪奇奇疑出恆理之外然而理具存焉不可得而疵也韓子云易奇而法詩正而葩苟法矣不必奇也可奇而不法奚可哉苟正矣不必葩也可葩而不正奚可哉後之名能文者多奇而不法葩而不正之作乃爲害道之尤者讀古人書其是非高下吾持是以決擇之庶乎其無大失與

衛文節公奏議序

沈德潛

宋衛文節公後樂堂集對策劄疏書狀凡十卷皆關係天人君國言人所不能言不敢言而其人之挺然獨立百折不回洵有如金石之堅貞者而宋史不爲立傳可怪也公於孝宗淳熙中以廷試第一人及第歷仕孝光甯三朝始終一節方其簽判鎮東任滿除祕書省正字屢進讜言乞修省論人才振紀綱明賞罰戒偷惰共十餘疏一無避忌光宗踐祚羣小登朝宮闈妬悍離隔重華公以震雷兩電後大雪繼作應詔上封事謂陽氣方升而陰制之有臣欺君妻凌夫外國謀中國小人害君子之象前後又十餘疏光宗概不之省甯宗朝韓侂胄柄政公斥居於外不調者十年當是時羣小蛾集程松納妾求知魯貢子授職陳自強因塾師而躋次相趙師舜以鳴吠而得美官蘇師旦賊吏也而冒受節鉞周筠隸卒也而妄任戎鈐內無根本之圖漫興北伐之議公時已召還上陳故事謂金人大讐必當復然將不先擇兵不素練恐輕舉妄動必致喪師辱國侂胄可斬纍纍數千言使甯宗早從其諫安內禦外何至皇甫斌敗於唐州秦世輔潰於城固郭倪圖於宿州血流淮甸軍殲乘陽而後斬蘇師旦逐陳自強函侂胄之首以謝金人耶此千百年後手公奏牘猶抑塞憤懣而不平者也且公所嫉惡者奸佞所表揚者正人前此侂胄以朱子爲僞學斥逐於外至是公奏請召還而朱子已卒復移檄刊刻經書傳注以垂永久又奏請召張子南軒又奏舉真子西山爲廉吏此其好惡之正深有得於正心誠意之學者而非徒以臆直自鳴附於汲黯之遺風者也按宋南渡以後廷

對第一人其策之可傳者前有王龜齡十朋後有文信國天祥公之對策於汴亂安危之故如燭照數計不愧二公况其一生文行如此焯焯而宋史逸之人謂宋史太詳吾謂詳者煩文畧者節目也豈非秉筆者之羞哉公文其五十卷刻於有元年久散佚十四世孫楫搜輯放失其得十卷屬予敘之餘尙有待也公名涇字清叔華亭人後遷崑山官資政殿學士封吳郡開國伯諡文節追封秦國公堂名後樂志范文正公之志可以想見其生平云

水道提綱序

齊召南

天地合水土爲體居天正中亦若人身然山其筋骨而水其脈絡也至靜者山靜中有動故爲幹爲支以一一而萬又以萬區界百川至動者水動中有靜故爲源爲委以萬而一又以一徧周六合陰陽自相經緯與日月星辰之麗天爲經緯者理氣協應此地道承天所以含萬物而化光也志地有書九邱尙矣治水莫神於大禹言地亦莫精於禹貢以治水先委後源則列敘九州疆域中高山大川自濱海之冀兗青徐揚州西迄梁雍以山自有幹與支水自有源與委則總序導山四列導水九川皆起雍梁而東至於海詩言旣景乃岡相其陰陽觀其流泉古聖人體國經野以建都邑利農田濟舟楫設津梁轉運阜財襟帶險固孰有不於水深究其本末者乎自漢後地志日多專言水者惟有水經及酈道元注道元於西北諸水巨細不遺可謂精矣後儒言水或解詩書春秋或釋班志或於寰宇略撮梗概或於郡邑各記方隅其志存經濟者於沿河沿海水利守邊博考古今暢言得失政理所係援引雖多不厭其繁雜若夫志在藝文情侈觀覽或於神怪荒唐遙續山海或於洞天梵宇揄揚仙佛或於游蹤偶及逞異眩奇形容文飾祇足供詞賦采用以爲美談從未有舉中國所有巨瀆經流共聞衆見可筏可舟不枯不涸如孟子所言原泉混混放乎四海用水經遺意上法禹貢導川總其大凡芟除地志繁稱遠引分名別號附會穿鑿之陋務使

源委了然展卷卽得此水道提綱所以紀載今日實有之脈絡山川都邑並用今名略識古蹟取其質不取其文如河經數徙濟惟入河漢有別支江源非一黑水未知誰是積石原在羌中前賢早有辨論無煩復贅取其實不取其虛也蓋自古帝王功德之盛莫如我朝重熙累洽治致升平幅員之廣盡天所覆亦莫如我朝召南學識愚淺自乾隆丙辰蒙恩擢入翰林纂修一統志伏睹聖祖御製輿圖東西爲地經度以占節氣後先南北爲地緯度以測底極高下漠北直過和林抵白哈海西番遙窮拉藏至岡底斯凡金沙瀾滄潞江崑崙青海之近在邊陲黑龍盧胸松花湫尼按出虎水烏蘇里江之本屬內地者源委秩如已迥非從前史志所能稍及我皇上聖神文武善繼善述天威遐震克奏膚功踰流沙而開四鎮蕩平伊犁回部拓地至二萬里西域並入版圖濛汜咸受正朔此豈漢唐元明盛時賓享貢王所能較量濶狹乎哉召南久在史館考校圖籍於直省外又專輯外藩蒙古屬國諸部道里翔實是以志成之後亦嘗條其水道惟圖無可據者闕之及蒙恩告歸台山杜門無事養病餘暇時檢篋中舊稿次第編錄共成二十八卷詮列次第不依水經冠以海水自北而南而西南至合浦外自雲南而西而北又自漠北阿爾太山肯忒山而東至海又自海而南而西而北包朝鮮至遼陽域中萬川綱目畢列至於蔥嶺以西水入西海印度水入南海丁零黠戛斯以北水入北海前史或略記其地以我朝之聲名洋溢凡有血氣莫不尊親則重譯慕思盡爲疆索占測經緯合寰瀛以成圖固可執筆俟也

外藩蒙古五十一旗序

齊召南

五十一旗地東接盛京黑龍江西鄰厄魯特南並盛京直隸山西陝西邊城北踰大漠與喀爾喀接壤延萬餘里周時獫狁山戎居之秦漢北邊外匈奴盡有其地漢末烏桓鮮卑雜處其間元魏時蠕蠕及庫莫奚爲大隋唐地屬突厥後入於回紇延陀遼金以來建置城邑同內地元之先

曰蒙古居西北極邊奄有天下遂成一統明初愛道識理達臘遁歸朔漠邊種蕃衍諸部時擁衆犯邊迄明世北陲不靖 本朝龍興蒙古科爾沁部率先歸附及滅察喀爾諸部相繼並降於是正其疆界悉遵約束從征伐 世祖定鼎錫爵得世及如古封建每歲朝貢以時其部落二十有五爲旗五十有一設官制度並同內八旗置理藩院以統之貢道分爲五路由山海關者科爾沁郭爾羅斯杜爾伯特札賴特四部爲旗十由喜峰口者阿祿科爾沁札魯特土默特喀喇沁喀爾喀左翼奈曼敖漢翁牛特八部爲旗十三由獨石口者阿霸垓及阿霸哈納爾左翼蒿齊武烏朱穆秦巴林克西克騰六部爲旗九由張家口者阿霸垓及阿霸哈納爾右翼蘇尼特四子部落喀爾喀右翼毛明安六部爲旗七由殺虎口者歸化城土默特吳喇武鄂爾多斯三部爲旗十二其驛路惟山海關外各旗並黑龍江大路不置驛站自喜峰口東北至札賴特千六百里置驛十六自古北口北至烏朱穆秦九百餘里置驛九自獨石口北至蒿齊武九百里置驛九自張家口西北至四子部落五百餘里置驛五自張家口西至歸化城六百里置驛六自殺虎口西北至吳喇武九百餘里置驛九自歸化城西至鄂爾多斯八百餘里置驛八鄂爾多斯六旗住牧河套卽秦漢河南朔方地宋時爲夏人所據者也五十一旗疆界山川具列如左

宋明大禮私議跋

齊召南

謹案繼統不繼嗣惟舜於堯禹於舜當之以異姓嬪代實君臣也若一代中或世或及其繼統也惟在繼嗣統無貳嗣亦無貳爲前君嗣子者始足爲君前君無子命族子爲子君命卽祖命也亦卽天命也預養宮中與臨時有詔一也此世嗣之繼而統不絕也前君無子傳同父之弟其名曰及無親弟而命從弟爲親弟以嗣其先君亦及也君命卽祖命亦卽天命也以旁支入承大統爲君命爲親弟始爲先君嗣子此以繼及爲繼世因繼統而繼嗣者也明太祖頒大明律服制多依

前古海內共遵一旦有子孫爲人後者襲世爵受世業不考所後而考所生名不正言不順族黨告之官官其不準禮据律斷以不孝乎爲人後者亦可以兄終弟及繼爵業不繼嗣之說解免乎况天子承天法祖其統之一惟在乎嗣之無二也邪說如璵尊名爭大禮實蔑法制亂天常逞私心興大獄而後來好辨論者尙多爲其所愚亦怪矣哉因讀貫一先生正議能掃邪說以明古禮之關倫常確不可易也

題沈端恪公神道碑後

全祖望

端恪神道碑文出於靜海廨尙書然其於公之學術節概有未盡者端恪少時嘗在靈隱寺中爲僧碑文諱之不知不必諱且更有不可諱者世宗憲皇帝夙耽禪悅其在朱邸徧讀三車經籍直見性宗及登極遂絕口不道然於熟處未忘也兵部侍郎臨川李公嘗以燕閒獨對上問之曰聞汝於書無所不見則二氏諒所盡通李公對曰臣向於藏經亦諦觀之然甚無補於天下國家上笑而頷之又數年端恪以吏部侍郎亦獨對上問之曰汝固嘗爲僧其於宗門必多精誦之言試陳之而端恪曰臣少年潦倒時逃於此及幸得通籍方畱心經世事以報國家日懼不給不復更念及此亦知皇上聖明天縱早悟大乘然萬幾爲重臣願陛下爲堯舜不願陛下爲釋迦臣卽有記安敢妄言以分睿慮上改容頷之曰良是時臨川已罷官聞而歎曰君子哉閻齋也說者以爲雍正十年以前內廷不舉法會者二公力也端恪前此爲選君尙書隆科多密勿重臣最專斷曹郎莫敢仰視端恪獨侃侃持正議一日畫諾尙書曰可端恪曰不可尙書怒端恪持之益力良久尙書怒曰沈選君諍友也改而從之且曰寮友當如此矣入告於世宗遂不次加太僕卿仍領選司自此得大用予嘗謂古今儒佛二家多由儒而佛者未有由佛而儒者有之自端恪始端恪旣爲儒私淑應潛齋先生之學故最醇潛齋在日端恪尙少及自靈

隱歸得見潛齋之高弟沈君士則凌君嘉卽從之求得其遺書乃知正學有在發明宗旨已而於潛齋語間有未安皆反覆以求其通論者以爲應氏功臣碑文極闡明端恪之學而不知其淵源所自出予故特表之東撫田文鏡請以耗羨歸於公用世宗已許行而猶召九卿議之衆以
上意所向不敢爭公獨爭之力言今日則正項之外更添正項他日必至耗羨之外更添耗羨他人或不知臣起家縣令故知其必不可行世宗曰汝爲令亦私耗羨乎公曰非私也非是且無以養妻子世宗曰汝學道乃私妻子乎公曰臣不敢私妻子但不能不養妻子若廢之則人倫絕矣世宗笑曰朕今日乃爲沈近思所難是日衆皆爲公懼然上雖不用公言而亦不怒也碑文微及此事而不悉端恪之卒其二子皆少故事跡不能盡詳其獨對語世所不知予從臨川李公得之當記之以登國史

全謝山結埼亭集序

杭世駿

謝山全氏有其鄉前輩凌儀慈谿兩先生之學而才足以振其滯口能道其胸之所記手能疏其口之所宣牢籠穿穴揉雜萬有其勿可及也已雖然僕竊聞之德產之致也精微禮之內心也德發揚詡萬物其外心也德勝文厚積而薄發文不勝德侈言無驗華言而不實多言而躁之數者之過謝山徵之謝山其知惕矣乎高一世之才而不聞道經郭史郎壹切駟駟折楊皇華升歌於清廟諸子繡襦被袷於巖廊於五行爲妖於文辭爲罪餒才貪學怖河漢而驚鬼神淵粹之儒啞其笑矣夫詩以抒情情蕩則辭溺文以伸理理屈則辭支苟有胸而無心曷克已以復禮張衡自謙於皮傳莊生取譬於探囊往蹇來連誚均苓耳謝山志銳而氣充冀洩章句小生獨以僕爲鹽石僕雖重性其得已於言乎凌之乎詩書之源不敢夸毗以炫世游之乎仁義之廣不敢堅僻以畔聖煩言碎辭皆有根核美章秀句無假藻斧區區之誠若是而已至於平昔研辨之文已見集

中茲則不復以贅也

禮例序

杭世駿

王荆公詆春秋爲爛熟朝報予謂春秋之斷爛在月與日而二百四十二年之行事未嘗闕也禮經經秦火漢開獻書之路而不盡出今所存者不止於斷爛而已補之以三春秋傳而不足補之以春秋外傳而不足又補之以管荀諸子及西漢諸儒所說者而仍不足所謂存什一於千百也士禮一十七篇豈盡士禮哉大射則天子之禮也聘燕則諸侯之禮也公食則大夫之禮也大事莫重於祭而天子諸侯無祭禮王事莫大於大饗大饗有七而其禮久亡士有喪禮而諸侯以上無喪禮天子諸侯有覲聘而征伐無行師用兵之禮舉其大端其爲斷爛也多矣况起居服食之末節乎鄭衆劉實撰春秋例予以爲春秋可以無例而禮則非例不能貫也例何所取吾於孔賈二疏中刺取之例立於此凡鄭之注士禮與鄭之注周禮者可參觀而得也例彰於彼凡士禮之所不注與周禮之所不注者孔與賈自默會而明也深於禮者病禮之斷爛而思補其闕承學之士又病禮之繁富而不得其門余特以例爲之階梯而有志者卽以津逮禮無不歸之例而天下亦無難治之經編葺既竟爲承學導之先路禮堂寫定傳諸其人予猶斯志也

厯學新說跋

杭世駿

有明藩獻之著述獨鄭世子學得其正厯學新說一書宣城梅徵君定九稱其能言授時大統之同異得失以授時消分太驟稍爲之通閒考春秋以來日食及史漢以後諸厯志所載以證其說明興三百年能深言授時法意者一人而已靈壽布衣朱仲福節錄其書改爲折中厯法徵君改爲厯學新說鈔平湖陸侍御宰靈壽時求得其書爲板行之考之王氏玉海其於累代之厯源流因革卓有原本自漢譜十八家以迄兩宋更造之次第較是說所稱引不啻倍蓰過之則是書大

密而小疎也居嘗論之天官之與太史氏古出於一今出於二推步之術史官自馬遷李淳風而外皆非專門名家後漢後魏以及元史尤不免於剽襲司馬彪臆陳張衡諸家之說於造厯之原本疎魏收厯志二卷上卷河西厯則本之趙攽下卷永安厯則本之孫僧化已不能置一喙焉元史成於迫猝而厯法頗精然止全寫郭守敬授時厯而已史官所謂秉筆者安在乎明史厯志成於湯文正公而改於黃聘君梁洲頗載世子厯議數則梅徵君以爲稍見大意夫立成細草有其法而無其書日躔月離知其術而難爲狀文章之士而能通乎天官氏之學其於作史也庶幾乎爾

明堂大道錄序

諸錦

著述莫難於經三禮尤難之難也錦讀學士牛農前輩禮說歎其於十三經注疏之外原始於蒼雅說文金石碑版出入於逸經子史旁及於天文鐘律方術本草小說虞初凡先秦古書宋彫未誤之本靡不鉤蹟索隱抉心執權貫串奧博精深卓乎聖朝之鴻編經解之拔萃所謂能讀三墳五典八索九邱能道訓典以敘百物者學者匪獨不能爲亦不能解也今讀定宇先生所著明堂大道錄禘說二書辨四廟七廟之制小記爲周初王制荀子爲晚周之記禮又禘之說周魯不同吉禘時禘名禘實祫方明爲六宗之位推所自始自朝日以迄獻俘皆本於明堂融洽載德蔡邕之說而去取於孔安國鄭康成劉歆袁準諸家雖漢儒復起有喙三尺無以相難也說者謂月令明堂禘祭原有成說何乃乖反徒取好異不知舉業則遵令甲說經則通漢儒果有發明爲禮經之羽翼者卽洛閩大儒亦所心許也獨是先生以經師人師困於諸生十試鎖闈報罷兩舉宏詞經學刺史不能薦天子不聞名聲類首鉛黃淹留過日而先生年亦已六十矣往者上以本朝經學之書延訪錦於經史轉對之日曾以公之禮說及安溪相國詩所德清胡氏渭禹貢錐

指經目進今又得公之子所著自硯溪先生以來素業三世不墜 聖天子按年省方南國翹材擢隱存歿與榮必有汲古尊經在 帝左右爲之上聞者當以惠氏之書爲拱璧矣然千秋絕學并在一家用則施諸人舍則傳諸其徒脉五相三公亦無以過也錦在都門親炙前輩之光輝久序定宇之書并以爲當代讀書種子勸使學者知所祈鄉因連而及之如此

再書封建論後

袁枚

或曰子言封建之非勢固已然如子孫何柳子曰尾大不掉則子孫徒建空名於公侯之上矣曰柳子亦知先王之愛百姓甚於愛子孫乎周公之命龜曰賢則昌不賢則亡武王滅殷欲作宮於五行之山周公不可曰五行之山天下之險也使我有德則天下之納貢者遠矣無德則天下之伐我者難矣此意也非獨周公意也卽堯舜禹湯所以封建意也當其時天子不仁則湯武至諸侯不仁則齊桓晉文至千八百國中苟有一賢君則民望未絕師曠曰天之愛民甚矣豈其使一人肆於民上先王亦愛民甚矣豈其使子孫一人肆於民上尾大不掉之說皆後世云云非先王意也雖然夏亡矣杞不亡殷亡矣宋不亡卽以子孫論而封建之天下雖亡不亡者何哉蓋公極而私存義極而利存天道然也亦非先王意也或曰封建之世如人才何柳子曰封建者繼世而理上果賢乎下果不肖乎又有世大夫之世邑世祿聖人生於其閒亦無以自立於天下曰以若所云則柳子不知今并不知古矣古者有國學所以教胄子也有鄉學所以教野人也彼言揚而行舉者其果專在國而不在鄉乎若夫舉舜於畎畝膠鬲於魚鹽傳說於版築伊尹於耕大公於釣管夷吾於士百里奚於市此并不在學校者也安見聖人生而無以自立於天下乎柳子之說爲孔孟言也夫孔孟之不能自立者道不行也非封建爲梗也然賴有封建然後栖栖皇皇之衛之齊之陳蔡之梁之齊之滕幾幾乎有可行之勢而諸侯敬子弟從則聲名愈盛千萬年後猶知遵奉爲師使聖人生於郡縣之世三